

適園叢書

張宗祥





太平治蹟統類卷二十八

宋彭百川撰

祖宗科舉取人

太祖

建隆元年扈蒙權知貢舉庚寅奏進士合格十九人楊礪周立舜等

二年權知貢舉竇儀奏進士合格十一人張去華等

三年知貢舉王著奏合格進士七十五人馬適等

九月復置書判拔萃科四年知舉浚儀薛居正奏合格進士

八人蘇德祥等

乾德元年九月丙子詔禮部貢舉人自今朝臣不得更發公薦違者重寘其罪故事每歲知舉官將赴貢院臺閣近臣得

保薦文藝者號曰公薦然去取不能無私至是禁止

閏十二月丁卯召翰林學士中書舍人於內殿覆試吏部試

中應拔萃科

田可封孫邁
宋白曹利用

上臨軒觀之試畢稱旨以利用爲

右拾遺田爲著作郎各賜襲衣犀帶利用加錫鞍勒馬

二年正月詔曰先以所置賢良方正能直言極諫經學優深

可爲師法詳閑吏治達於教化等三科並委州府解送吏部

試論三道限三千字以上自曩及今未有應者得非抱倜儻

者恥肩於常調懷讜直者難動於有司必欲興自朕躬乎繼

今限內外職官前資見任布衣黃衣並許詣閣門投牒自薦

朕當親試焉

三月知貢舉陶穀奏合格進士八人

李景
陽等

四月賢良科一人博州判官穎贇策試稱旨故也

三年知貢舉盧多遜奏合格進士六人

劉察等

四年王祐知貢舉言進士合格者六人諸科幾人上恐其有

遺才復令於不中選人內取優長者策而升之

李肅畢士安等

開寶元年王祐知貢舉奏進士合格者十人陶穀子邴名在

第六翌日入謝上謂左右曰聞穀不能訓子安能登第因下

詔曰造士之選匪樹私恩世祿之家宜敦素業如聞黨與頗

若切吹文衡公器豈有私濫自今舉人凡關食祿之家具析

以聞當令覆試

陶邴覆試復登第

二年知貢舉趙逢奏進士合格者七人

是月親征逢隨軍轉運使取士或在行宮當考

安德裕柴成務王獻可董循

張紳陶邴係元年所得之人

三年三月壬寅詔禮部貢院闕進士諸科十五舉以上曾終場者以名聞 甲辰得司馬浦等六十三人 庚戌復取未

經場人四十三人並賜出身詔自今勿以爲例知貢舉扈蒙

擢進士合格者八人

張拱王挽
張茂直等

四年盧多遜知貢舉進士合格者十人

劉寅衛續
劉瑗等

五年扈蒙知貢舉奏合格進士安守亮等十一人諸科三十

八人詣講武殿上以進士武濟川材質最陋絀之濟川乃學

士李昉鄉人昉知貢舉上不悅會徐士廉訴昉用情取舍非

當上以問學士盧多遜曰頗亦聞之上令貢院籍下第人姓

名三百六十人 癸酉召見擇一百九十五人宋準以下及

士廉各賜紙札別試命御史李瑩等爲考官 乙亥上親閱

得進士二十六人。士廉與焉。皆賜及第。又賜準錢二十萬。以張宴會責昉爲太常少卿。考官楊可法等皆坐責。自茲殿試爲常式。宋準賈源范翔郭成範張素左貞董箱李巨源武濟川裴詢黃相是年重試。宋準賈源范翔郭成範張素左貞裴詢李巨源董箱劉總田寶之柳毗劉洗任載宋玄慶徐士廉安肅趙白貞梁誼呂鎊王仕王文範趙世南王利用王渭五經四人。開元禮七人。三禮三十八人。三傳二十六人。三史三人。學究十八人。

夏四月詔諸州考試官令長吏精擇僚屬有才學公正者充知貢舉。與考試同看詳議卷。定其通否。卽駁放不得優假虛名。至終場中禁私薦屬科人募告者。其賞有差。舉人勒還本

貫重役永不得入科場

八月丁卯王祐知貢舉知制誥扈蒙左補闕梁周翰祕書丞雷德驤並權同知貢舉權同貢舉始此 戊辰上御講武殿覆試王祐等所奏合格舉人王式等因語之曰向登科名多爲勢家所取塞孤平之路甚無謂也今朕躬親臨試盡革疇昔之弊式等皆頓首謝於是出外賦題得進士王嗣宗以下三十人諸科三十四人江南進士林松雷說試不中格以其閒道來歸並賜三傳出身王似宗王式劉克荷拔萃科

乾德二年四人

建隆三年復置選人限格未至者各取本州解至吏部試判二條分五等放選利用等吏部試中詔翰林學士於內殿復

試帝臨觀之賜襲衣金帶

乾興元年宋若谷以下六十五人

天聖三年林異以下四人六年常禹錫以下八十三人九年

蕭禮以下三十人

太宗

太平興國二年正月上初卽位以封疆至遠吏員益眾思廣

振淹滯以資其閒闕顧謂侍臣曰朕欲博求俊乂於科場中

非敢望拔十得五止得一二亦可爲致治之具爾禮部上所

試合格人名上御講武殿出賦題覆試依次用韻命翰林學

士李昉扈蒙正定其優劣得河南呂蒙正李至張宏張齊賢

王化基王沔温仲舒一百九人並賜及第餘並賜出身凡五

百人皆先賜綠袍靴笏賜宴開寶寺上自爲詩一章賜之唐
時禮部放榜之後醵飲今曲江號聞喜宴五代於名園佛舍
中周顯德中官主之上命中使典領供帳甚盛第一第二等
進士并九經授將作監丞大理寺評事通判諸州同出身及
諸科並送禮部免選優等注擬初資職事判司簿尉寵章殊
異歷代所未有也辭居正等言取人太多用人太驟上欲興
文教抑武事弗聽及蒙正等辭乃召令升殿諭之曰到治所
有不便於民者疾置以聞仍賜錢二十萬或曰太祖之幸西
京也洛陽張齊賢獻下并汾富民封建敦孝舉賢太學籍田
選良吏懲姦謹刑十策太祖召見使坐問之齊賢以手畫地
條陳太祖善其四齊賢堅執其餘皆善太祖怒令衛士曳出

及還語上曰我幸西京惟得一張齊賢我不欲遂官爵之汝異時可收以自輔也於是齊賢舉進士上決欲置之高等有司第其名適在數十人後上不悅乃詔進士盡第二等及九經凡一百三十人悉與超除蓋爲齊賢故也

三年八月上先詔權罷貢舉恐場屋閒有留滯者乃詔諸州去年已得解者除三禮三傳學究外餘並以秋集禮部

九月上御講武殿合試合格禮部人進入加論一首得胡旦以下七十四人乙酉得諸科七十人並賜及第始宴於迎春苑授官如二年之制故事禮部唯春放榜秋試非常例也五年閏三月上御講武殿覆試進士得蘇易簡以下一百十九人又得諸科五百三十三人並分第甲乙賜宴

雍熙二年正月上謂宰相曰夫設科取士之門最爲捷要然而近年籍滿萬餘人得無濫進者乎 己巳詔自今諸科並令量定人數相參引試分科隔坐命官巡察監門謹視出入有以文字往復與吏爲姦者寘之於法私以經義相教者斥出科場伍保預知亦連坐進士倍加研覆貢舉人勿以曾經御史不考而薦始令試官親戚別試者凡九十八人又罷進士試貼經 上御崇政殿復試禮部貢舉人得進士須城梁顥等百七十九人 庚申得諸科三百一十八人並唱名及第唱名自此始據登科記宰相李昉之子宗諤參知政事呂蒙正之從弟蒙亨鹽鐵使王明之子扶度支使許仲宣之子待問舉進士試皆入等上曰此並勢家與孤寒競進縱以藝

升人亦謂朕爲有私也皆罷之 青州人王從善應五經舉
年始踰冠自言通誦五經通注上歷舉本經試之其誦如流
特賜九經及第面賜綠袍銀帶錢二萬時左右獻言尙有遺
材 壬戌復試又得進士上元洪湛等七十六人 癸亥得
諸科三百二人並賜及第

夏四月丙子復置明法科分周易尙書各爲一科以論語孝
經爾雅三小經毛詩專爲一科明法亦附三小經進士九經
以下更不習法書又以鑠廳求試者率多繆濫令諸道州府

自今擇材學優等而歷官無過者乃舉之仍先奏俟報

甲科梁顯

年八十二作狀元張惟明錢若水陳允省元 乙科呂防李
防任中正閩江陵令 丙科趙安仁陳彭年凌策宋維善陳

昭慶 四
等崔度

端拱元年夏四月丙申先是翰林學士禮部侍郎宋白知貢
舉放進士程宿以下二十八人諸科一百人榜既出謗議蜂
起或擊登聞鼓求別試上意其遺材 壬寅詔下第人覆試

於崇政殿得進士馬國祥以下及諸科凡七百人令樞密院
用白紙爲牒以賜之試中爲目令權知諸縣簿尉謂樞密副
使張宏曰朕自卽位以來親選貢士大者爲棟梁小者爲榱

桷今封疆萬里人無棄材日思孜孜庶臻理本卿與蒙正曩
者頗爲大臣所沮非朕獨斷則不及此宏頓首謝曰凡三掌
貢士所取如蘇易簡王禹偁輩皆知名而罷黜者眾因致謗
議時知制誥李沆亦同知貢舉謗議獨不及

程宿省元王扶
陳堯佐石成之

諸科盧范以
下八十餘人

上旣擢馬國祥等猶恐遺材復命左右正言

王世則等召下第進士及諸科於武成王廟重試得合格進士數百人 丁丑上覆試詩賦又拔進士葉齊以下三十一

人諸科八十九人並賜及第

葉齊江拯趙準等

雍熙二年三月先是翰林學士知貢舉蘇易簡等固請親試

壬寅上御崇政殿試合格舉人得進士

陳堯叟知白曾會姚揆蘇奐趙稹張

智盛度等一百八十六人賜宴令兩制三館文臣皆與賜堯叟等

箴一首勉以修身謹行稽古效官之意

十二月上謂宰相曰國家取士歷級而升下位韜晦才行者多矣當勿以此為限庶朕急賢之志因言為人臣者治平之代功效難見若亂世則止用其才不顧其行如陳平韓信頃刻能立功業當治平則無所施其謀略故孔子四科以德行

爲長又言下位卑秩不可謂無良士大凡孔子含章守道難
進易退不求聞達故常患其不能知也呂蒙正曰迭試事任
則能否洞分上曰性之善惡何由知之蒙正曰人之爲善終
不能掩久則彌著至於爲惡亦然苟暫聞善惡或涉愛憎恐
誤任使必久而察之則賞罰無濫上善其言

淳化三年三月上御崇政殿覆試合格進士先是胡旦蘇易
簡王世則梁顥陳堯叟皆以試先成擢上第由是士爭習浮
華尙敏速或一刻數詩或一日十賦將作監丞莆田陳靖上
疏請黏名考校以革其弊上嘉納之於是召三館文學之士
始令黏名考校第其優劣以分等級內出卮言日出賦題試
者駭異不能措詞相率叩殿檻上請會稽錢易時年十七日

未中所試三題皆就言者指其輕俊特黜之得孫何省元未台符路振王

欽若丁度張士遜王曙薛奎等以下凡三百二人並賜及第上諭之曰爾等

各負志業中我廷選效官之外更勵精文翰勿墜前功也何

等旅拜稱謝 辛丑覆試諸科就宴錫御製詩三首進士孫

何而下四人皆授將作監丞大理評事通判諸州餘及諸科

授職事州縣官入謝於長春殿上謂宰相曰天下至廣藉羣

材共治之今歲登科第又千餘人皆朕所選擇此等但能自

檢情美替而歸則馴致亨衢未可測也時詔刻禮記儒行篇

賜大臣及百官受任於外者并賜何等令為坐右之誠初內

殿策士賜詩至堯叟易以箴至何則詩箴並賜時論榮之

咸平元年翰林楊礪等受詔知貢舉請對上召坐詔之曰貢

舉重任當務選擢寒俊精求藝實以副朕心礪建隆初榜首及第

二月壬辰詔禮部貢院考試畢日錄合格人姓名以聞當議降敕放榜賜及第如覆試有濫謬知舉官重行朝典 戊戌詔以久停貢舉頗滯時材令禮部取合格人內進士放孫僅等五十人諸科百五十人來歲不得爲例舊制國子監開封舉人有與發解官親戚者止兩司更互考試上慮涉私是秋特選官別試錢若水等覆考進士試卷故事京府解十人已上謂之等甲非文業優贍有名稱者不處時以高輔堯爲首錢易次之易頗爲流輩所推許輒不平遂上書指陳發解官所試朽索馭六馬賦又論詩策題意涉譏訕又進士百十人

詣府訟薦送不公輔堯亦投牒遜避請以易爲首開封府以
聞故有是命仍令兩制議所訟題時翰林學士承旨宋白深
右易考官度支員外郎馮拯力言易士行不可冠天府多士
上以士流紛競不可啟其端且欲鎮壓浮俗乃詔止拯罷兩
制議及覆考止令若水等有文行兼著者一人爲首乃以孫
暨等爲第一輔堯第二易第三餘並如初易初以輕俊被黜
旣而太宗與蘇易簡曰當時文人且歎不與李白同時易簡
言易能爲歌詩殆不下李白太宗大喜曰果如是吾當以白
衣召至禁林會盜起淮南事乃止

二年正月乙丑命禮部尙書溫仲舒知舉御史中丞張詠知
制誥師頴同知貢舉刑部員外董龜正王涉同考試及封印

卷首仍當日入院禮部貢院封印試卷自此始 癸亥詔今
歲舉人至眾乃依例恐有遺落可增及七十人諸科增一百
八十人禮部尋以孫暨等二百五十人名聞內諸科一舉六
人特黜去之餘並賜及第

五月詔天下貢舉人應三舉者今歲並免取解自餘依例舉
送必求才藝不使遺賢當俟奏名朕親臨試

三年二月學士王旦等三人同知貢舉 三月甲午上御崇

政殿親試命翰林學士承旨宋白等於殿後西閣考覆國子

監博士雷悅著作佐郎梅詢封印卷首親覽入等賜

陳堯復
周企李

杜

二石岳夷簡

三甲任布

四

甲姜遵

五石待問何宗朝等

四百九人及第賜宴日

以御詩褒美之上凡三日臨軒初無倦怠之色所擢凡千八

百五人其中有自晉天福中隨計者較藝之詳推恩之大近來所未有也 四月賜應制舉人林陶同進士出身陶就試學士院不及格上方欲來俊茂故特獎之

五年三月上親試禮部舉人得進士益都王曾以下三十八

人九經諸科百八十人並賜及第

王曾省元王隨韓億章得象等

先是貢舉

人集都下者萬四千五百六十二人命吏部陳恕知貢舉恕所取士甚多以王曾爲首及是黏名考校曾復中甲科時議稱之

十一月河陽判官張之白上疏其一言科舉之弊略云聖人居守文之運將放清化源在乎正儒術古之學者簡而有限今之學者其書無涯其道非一是故學彌多性彌亂今進士

之科入爲時所進用其選也殊其待也厚進士之學者經史子集也有司之取者詩賦策論也是故五常六藝之意不違探討其所習泛濫而無著非徒不得專一又使害生其中何謂其然且羣書之中真僞相半亂聖人之微言者皆多傳大道之宗旨者非一若使習而成功得不揉瘳粹之性蕩中正之氣其爲吏也安能分挈治柄使教令不黜哉況夫儒者之術不以廣記隱奧爲博學不以善攻奇巧爲能文若使明行制令大立程式每至命題考試不必使出於典章之外參以正史至於諸子之意必須輔於經合於道者取之過此並斥而不用然後先策論後詩賦責治道之大體捨聲病之小疵如是則使夫進士之流知其所習之書簡而有畧知其所學

之文正而有要，不施禁防而非聖之書，自委棄於世矣。不加
賞典而化成之文，自興行於世矣。上覽而嘉之，召試舍人院
除右正言。

景德二年三月甲寅，上親試禮部奏名舉人，得進士李迪以

下二百四十六人，第爲五等。

李迪李諮
劉滋王鉅

上謂宰相曰：「昨親閱

考官所定試卷，意其入下等太多，卽別加詳考，往往合格比
緣入試多，士黏名校覆在於公當，而考官不知朕意，過抑等
第，欲自明絕私，甚無謂也。迪所試最優，李諮亦有可觀，聞其
幼年母爲父所棄，在舅氏，諮日夕號泣求還其母，乃致絕。董
茹禱祈，又能刻苦爲學，自取名級亦可嘉也。以迪爲將作監
丞，諮及夏侯麟爲大理評事，通判諸州進士第一等爲試校。

書郎先是迪與賈邊皆有名場屋及禮部奏名而二人皆不與考官取其文觀之迪賦落韻邊論當仁不讓於師為眾與注疏異特奏令就御史參政王旦議落韻者失於詳審捨注疏而立異論輒不可許恐士子從今放蕩無所集的遂取迪而黜邊當時朝論大率如此

夏四月樞密直學士劉師道責授忠武行軍司馬知制誥陳堯咨單州團練使副先是師道弟正道舉進士禮部奏名將廷試近制黏名考校堯咨為考官教正道於卷中密為私號正道既上第或告其事詔落名永不預奏 庚申上親試士百人得進士范詔等五十一人餘賜出身特奏名進士李正辭論文武先後以為文者本乎靜武者本乎動動以止亂而

乎靜則先後可知上嘉其近理將擢上第會有言嘗犯杖
遂補三班奉職 撫州進士晏殊年十四大名府進士姜益
年十二皆以俊秀聞乃召試殊試詩賦各一首益試詩六首
殊行文敏甚上乃歎賞宰相寇準以殊江左人欲抑之而進
益上曰朝廷取士惟才是求四海一家豈限遐邇如張九齡
何嘗以僻陋棄乃賜殊進士出身益同學究出身後一日復
召殊試詩賦殊言賦嘗所私習上益愛其凜直改題他題既
成上曰善擢祕書省正字祕閣讀書 翰林學士晁迥等上
考進士新格詔頒行之 初陳彭年以進士輕俊喜謗主司
宋白知貢舉惡其爲人黜落之彭年憾然於是更定條制多
憶白舊事而設關防所取不復揀擇文行止校一日之藝雖

杜絕請託然寘甲等者或非人望自彭年始也

大中祥符元年夏上親試進士命李宗諤等八人爲考官諭宗諤等務在精詳勿失賢俊賜進士姚曄等及第先是謝愿方令釋褐是日特賜綠袍靴笏以曄等三人爲將作監丞大理寺評事通判諸州四五爲兩使推官六以下爲試銜知縣

餘簿尉

姚曄祖士衡鄭向杜衍王諤

先是監察御史張士遜爲貢院監門

官時貢舉初用黏名之法士遜自主司有親戚在進士中明日當引試願出以避嫌主司不答士遜乃自言引去上是之記名於御屏乃詔自今舉人與試官有親嫌者皆移試別頭二年六月上御崇政殿服勤詞學經明行修人第爲五等賜進士梁固等及第固願之子也以灑遺蔭賜進士出身服除

詣登聞讓前命願赴鄉舉從之

四年十一月先是汾陰赦書舉服勤詞學經明行修之士如東封例惟不重考

丙子上御殿親試進士叩殿檻請示詩

賦論題所出上令錄示之方令試賦論中不得用小臣儒有

字又以冬日景短罷常務不決卽令引試內新定條制舉人

內試卷內臣收之先付編排官去其鄉貫狀以字號第之付

彌封繕錄校勘用御書印方付考官定等訖又彌封送覆考

官再定編排官閱其同異未同者再考之如復不同卽以相

附近爲定始取鄉貫狀字號合之乃第其姓名差次并試卷

以聞遂臨軒唱第賜進士

張師德丁
度程琳等

三十一人及第汾陰路

多上文章

庚辰詔以約州參軍許洞推官解旦等九人姓

名附中書言旦及進士范本陳矩詞學可采授旦著作佐郎
本賜及第矩出身

五年王子上謂宰相曰聞貢院試諸科舉人皆解衣閱視慮
其挾藏書籍有失取士之體宜令止之先是直史館劉鍇請
依本并同保人殿一舉是歲諸科以挾書扶出者十八人并
同保九十三人而十二人當奏名有司以聞上特令赴殿試
乃詔禮部別加裁定罷同保殿舉之制詔錄諸州軍試題進
內上將試進士慮其重復故有是用爲常例 己丑上親試
禮部合格貢舉人殿之廊廡分列位次署其名氏仍揭於榜
使不得遷易始模印試題以賜官給紙起草得進士

徐奭明
鑄徐杲

王咨孔
道張演

一百二十六人

五月戊辰詔禮部權止今年貢舉

七年秋丙子詔自今差發解知與等授敕訖卽令閣門祇候一人引送鑣宿不與得僚友交言違者閣門彈奏如所乘馬未至卽以廐馬給之因王曾駁詔與試舉與學士李維偶語

閣門使魏昭亮意曾受維請託奏之因有是詔

曾以妻臨產屬維以家事

上御景福殿試亳州南京路服勤詞學經明行修舉人得進士林宥張觀等二十二人賜及第除官如西京例上謂宰相曰近年舉人文藝頗精孤平得路然爲主司亦大有不易徇請求則害公絕薦託則獲謗王旦曰今郡縣至廣人數亦多必須臨軒親試至於南省解發亦朝廷特爲主張則雖責成主司亦難以集事

八年六月以童子蔡伯希爲祕書省正字其父龜從爲校書郎以龜從善於教子召試中書而命之伯希四歲誦詩百餘篇初開封府解服勤詞學進士二十人爲下第者劉漑所訟其十三人以寓賢皆奔竄潛匿有司追捕王旦奏曰陛下比降恩詔搜羅才俊今乃變爲囚繫有傷風教且科舉之設本待賢德此輩操行如此望特出宸斷以懲薄俗上曰此蓋當時不曾澆諭致此過誤其寓賢者當並釋罪漑付外州拘管旣而御史高弁上言漑訟事得實被責太過上以問旦旦曰漑訟本非有心據款乃俟其得解則訟乃是搢紳之蠹賊朝廷黜其無行諫官所宜樂聞弁妄形奏對由是言之向非聖斷明哲辨舉子誤犯則須連坐府縣御史抨彈甚無取也上

覽諸道貢舉之人盛於常年因曰外郡官吏未體朕心比者
詔累下但戒其徇私爾若能精擇寒俊雖多何害是歲多置
謄錄院令彌封印官封印所試卷付之集書吏錄諸司供帳
內侍二人監焉命京官校正用兩京奉使印訖復送印院始
送知考官考校 丙子詔禮部貢院進士六舉諸科九舉以
上有不合格並許奏名 戊戌趙安仁上合格之人姓名上
謂宰相曰今歲舉場似少謗議安仁等乃對朕亦以此語之
矣王旦曰條式備具可守而行至公無私其實由此 癸卯
上御殿覆試多所黜落又疑所加抹者未當命宰相閱視之
旦曰考過爲艱難公在其中矣於是得進士 蔡齊王舉正等 四十九
人 乙卯科 龐籍范仲淹李若谷等 三百八十八人餘諸科並賜及第同

出身除官如元年之制齊等考定上顧問王旦等曰有知姓名者否皆曰人無知者真所謂搜求寒俊者故事當賜第一新喻人蕭貫與齊並見齊儀狀秀偉舉止端重上意已屬之知樞密院寇準又言南方下國人不宜冠多士齊乃居第一上喜謂準曰得人矣特詔金吾給騶士出兩節傳呼因以爲例準性自矜尤惡南人輕巧旣出謂同列曰又與中原奪得一狀元齊膠西人

四月賜進士楊偉及第賈昌期同出身大禮之初貢舉人呈請頌者甚眾近臣詳考惟偉及昌朝可采故召試學士院而命之

天禧元年冬前江州瑞昌縣主簿劉若冲進所業命試舍人

院以策論稍優特加兩資先是若冲建議自今召試者並請
試策至是用其議而命之

二年秋詔自今試所廳舉人所在長吏先考藝業合格卽得
取解如至禮部不及格當停見任其前後舉送長吏並重寘
之其罪

三年二月翰林學士錢惟演等四人同知貢舉諸路貢舉人
郭稹等見於崇政殿稹冒總喪殿三舉同保並殿一舉時有
司欲脫王洙問洙曰果保稹否不然可易也洙曰保之不願
易也乃與稹俱罷

三月上親試禮部奏名貢舉人作詩賜考校官令皇子書示
宰相得進士王整以下及第

程戡常馬
錫孫堪

除官如前例

乾興元年夏壬寅以光祿寺丞尉氏馬季良家本茶商劉美女壻也於是召試館職太后遣內侍賜食促令早了主試者分爲作之

仁宗

天聖二年春正月甲午詔禮部貢院開封府國子監及別頭各增置點檢試卷封彌巡鋪監門官有差 癸卯命御史劉筠等同知貢舉

二月乙丑上謂王欽若曰久罷貢舉慮遺天下賢士宜令禮部貢院精加校試將來放進士特增置二百人諸科三百五十人

三月禮部上合格進士姓名詔翰林晏殊學士馮元編排等

第 乙巳賜宋郊葉清臣鄭戩等及第郊與弟祁俱以辭賦
得名禮部奏祁名第三太后不欲弟先兄乃推郊第一祁第
十劉筠得清臣所對策擢第二國朝以策擢高第自清臣始
夏四月庚辰以特奏名進士李道宗等諸科王播等爲將作
監主簿及諸州長史文學參軍道宗等皆年止五十常應六
舉王播年止六十常應八舉上因謂大臣曰此雖舉業非工
然閱其白首無成故甄錄之第一甲葉清臣鄭戩高若
一余
宋咸尹
殊胡宿第一人爲通判德車結旌賦采侯
詩

三年八月辛亥知益州薛田言本州解發舉人自張詠以來
例給館券至京師今得三司移文以責吏人償所給官物恐
非朝廷之意上曰漢貢士皆郡國給食今獨不能行之遠方

耶其令悉免之

四年五月己卯詔禮部貢舉人實應三舉諸科五舉並免取解詔增西川廣南東西路諸州軍進士解額有差 又詔命

官鎖廳應舉自今更不試所業乙第者免責罰古制先於所

屬選官考試所業方聽取解至禮部程文不工勒停不及格

贖同至是上欲開誘進士之路近臣參定而降是詔

下第免責景祐

元年四月又有詔蓋此專指下第者候一及不得解者

冬十月乙酉詔進士諸科曾經先朝御試而今不預薦者許

就省試

五年春己未詔禮部貢院比進士以詩賦定去留學者咸賡聲律而不得騁其才其以策論兼考之諸科毋得離析經注

以辨問目 辛酉御崇政殿試禮部奏名進士仍命翰林學

士宋綬以下二十六人爲封彌謄錄考覆詳定編排官如舊

制 乙丑賜進士王堯臣等及第三百三十七人 韓琦趙鼎包拯吳育

陳希亮文彥博 一甲劉觀王翼 聖有 謨烈賦 南風之薰詩 執政如金玉論

夏癸酉試特奏名及諸科場同出身尋下詔戒諭諸道舉人

宜奮勵文學毋坐視日月以望恩澤

七年閏五月己未朔詔禮部貢舉庚申詔曰朕試天下之士

以言觀其趨向而比來流風之弊至於附會小說磔裂前言

競爲浮夸靡曼之文無益治道非所以望於諸生也禮部其

申飭學者以明先聖之道有合朕意焉

八年春丙寅命資政殿學士晏殊同知禮部貢舉

三月御崇政殿親試進士王拱辰等二百四十九人並賜及

第

劉元孫材蔡袞田況石介歐陽修
甲田師錫元絳劉元俞孫甫唐介尹原

上三名並僉判

八月學士晏殊言唐明經並試策問參其所習以校材識今專取記誦請終試策一篇詔近臣議可否咸以諸科非素習議乃止

明道二年秋七月乙亥詔諸州自今考試舉人並封彌卷首仍委運司於所部求才學若公勤者爲考試監門封彌官

冬十月上諭內臣曰近歲進上所習詩賦多浮華而學古者或不得以自進宜令有司兼以策論取之

景祐元年春詔曰朕念天下士鄉學益繁而取人之路尙狹使孤寒棲遲田里白首而不得進朕甚閔之其令南省就試

進士諸科十取其二進士五舉年五十諸科六舉年六十常
經殿試進士三舉諸科五舉預先朝御試試不合格毋輒黜
皆以名聞自此率以為常

三月戊寅試禮部奏名進士張唐卿以下並賜及第

張唐卿
楊察石

詢直吳祕林槩張來楊靖蔡挺蘇舜欽柳
三友石亞之石元之梁適柳三接劉安世

四年春甲寅詔禮部貢院自今年三月一日申請貢舉其舉
人到省以十一月十五為限先是賈昌朝言舉人有親戚仕
在本州及侍父祖遠官本州二千里宜敕運司選官類試以
十率之取三人詔兩制議丁度言貢舉古制以五月一日申
請十月二十五日上召于省若二千里移試不及願稍寬其
期一如昌朝說故降是詔自是諸路始有別頭試

六月丙申詔開封及國子監及別頭試自今封彌謄錄如禮部左司諫韓琦之請也

十月己未章得象言開封進士章仲昌臣鄉里疏屬實無藝業近聞訟訴發解不公事請牒歸其家從之時鑰廳應舉

人特多開封投牒者百十國子監及諸州不在及出榜宰相陳堯佐之子博古爲解元參政韓億子孫四人無落者故嘲謗羣起然殿中侍御史蕭定基直集賢院韓琦吳育王拱辰實司試事非有所私也

寶元元年春試禮部奏名進士三百十人及第賜諸科四百十四人及第并出身特奏名被恩賜者又九百八十四人瓊

林宴初試太學篇

呂臻祖無擇石揚復王屏司馬光李大臨范鎮呂晦吳中復吳充陳執中

先是

上以開封所解進士陳博古等嘲謗籍籍詔陳博古并韓億
四子并兩家門下士范鎮家靜試卷皆勿考鎮成都靜眉山
人考官奏請鎮固有文久馳名場屋非附兩家之勢而乃得
聽考而降其等級鎮禮部奏名爲第一故事第一人賜第未
有第二甲者雖近下猶升之吳育歐陽修殿庭唱第上三人
亦抗聲自陳鎮乃默然至第七十九人乃拜出退就列無一
言眾以是賢之禮部第一人在第二甲自鎮始初辟奎知益
州還朝與鎮俱或問奎入蜀所得奎曰得一偉人當以文字
名世

二年十一月壬辰詔禮部自今詩賦論題並以注疏所解揭
示之不許上請或題目有疑當請者仍不得近簾

閏十一月鎖廳別試

慶歷二年丁巳命翰林聶冠卿權知貢舉初學士李淑侍經筵詢以進士詩賦策論先後俾以故事對淑退而奏曰唐調露二年劉思立爲考功員外以進士試策滅裂請帖經以見其學試雜文以見其材自此沿以爲常至永隆二年進士試雜文通文律者始試策天寶十一年進士試一大經能通者試文賦又通而後試策五條皆通爲中第建中二年趙贊請試以時務策五首論表贊各一首以代詩賦大和二年試帖經略同大義取精通者次試論議各一首八年禮部試以帖經口義次試策五道問經義者三問時務者二自後變易而以詩賦第一場論第二場策第三場帖經第四場今陛下欲

求理道不以雕篆爲貴得取士之方矣然考官以所試分考不能通加評較而每場輒有退落士之中否係於幸不幸耳願約古制先策次論次賦次帖經墨義而敕有司并試四場通較工拙毋以一場得失而去留詔有司議稍施行焉

二月知制誥富弼言國家沿隋唐取士之制景德以來爲法尤密言省試有三長殿試有三短不容私詩賦策論才能可見兩月餘研究泛取不擇三篇不能盡人考究 又言殿試始于武后不足法 辛巳詔罷殿試翰林王堯臣同修起居注梁適皆以祖宗故事不可據廢越三日詔殿試如初

三月賜進士楊寘等三百三十七人及第寘察第初試國子監禮部皆第一及是帝臨軒啟封見姓名喜動於色謂大臣

曰楊寘也公卿相賀爲得人授將作監丞判潁州

楊寘韓絳
王珪陳洙

王安石呂公著蘇
頌傅堯俞呂夏卿

三年八月上擢任范仲淹責以太平仲淹條奏十事三曰精
貢舉略云外郡發解進士本鄉舉里選之式必先考其履行
然後取其藝業今乃不求履行惟以詞藻墨義取之加用封
彌不見名姓大非里選之本意也又南省考試舉人一場試
詩賦一場試策人皆精意盡其所能復考較日久實少舛謬
及御試之日詩賦文論其爲一場既聲病所拘意思不達或
音韻中一字有差生平苦辛卽時擯逐如音韻不失有末學
淺近俯拾科第旣鄉舉之處不考履行御試之口更拘聲病
以此士人進退多言命運而不言行業明君在上固當使人

以行業進乃言命運者是善惡不分而歸于天也豈國家之
美事哉臣請重定外郡發解條約須是履行無惡藝業及等
者方得解薦更不封彌試卷南省考試之人已經本鄉詢考
履行更須封彌試卷藝業定奪高下訖入進御前選官覆考
重定高下訖然後開看明年施行南省所定高下內合同姓
名偶有高下更不移改若等不同人數必少卻加封彌更宜
兩地參較然後御前放榜此爲至當內三人以上卽於高等
人中選擇聖意宣放其考校進士以策論高詞賦次者爲優
等策論平詞賦優者爲次等諸科經旨通者爲優等墨義通
者次等己上進士諸科並以優等及第者放選注官次等及
第者守本科選限自唐以來及第人皆守選限國家以收復

諸國郡邑之人其新及第人權與放選注官今來選人壅塞
宜有改革又足以勸學使知聖人治身之道則國家得人百
姓受賜

四年春范仲淹等意欲復古勸學常言興學校本行實詔近
臣議於是翰林宋祁御史王拱辰知制誥張方平歐陽修侍

御史梅摯侍講曾公亮王洙右正言孫甫監察御史劉湜

此乃

李清臣
史藁

合奏曰伏奉詔有口取士當求其實用人當盡其才

今教不本於學校士不察於鄉里則不能覆名實有司策以
聲病學者專於記誦則不足盡人才此乃議者所共爲言也
謹參考眾說取其便於今者莫若使士皆土著而教之以學
校然後州縣察其履行則學者修飭矣故爲設定學舍保薦

送之法夫上之所好下之所向今先策論則文詞者留心於
治亂簡程式則闕博者得以馳騁矣取大義則執經者不專
於記誦矣其詩賦之未能肄者雜用今體經術之未能亟通
者尙如舊科則中常之人皆可勉及矣此所謂盡人之才者
也故爲先策論過落簡詩賦考式問諸科大義之法此數者
其大要也其州縣封彌謄錄進士諸科帖經之類皆苛細而
無益一切罷之法行則申之以賞罰如此養士有本取才不
乏爲治之本也 乙亥詔曰儒者通天地人之理明古今治
亂之原可謂博矣然學者不得騁其說而有司務先聲病章
句以拘牽之則吾豪俊奇偉之士何以奮焉士有純明茂材
之美而無文學作成之法其飭身立節者使與不肖之人雜

而並進則無文德敏行之才可以見焉此取士之甚弊而學者自以爲怠亦曰屢以爲言此令詳酌仍令政事府參定皆謂本學校以教之然後可求其行實先策論則辨理者得盡其說簡程式則閱博者可見其才至於經術之家稍增新制兼行古法以勉中人煩法細文一皆罷去明其賞罰俾各勸焉如此則待人之意周取人之意大夫遇人以薄者不可責其厚也今朕建學興善以尊子大夫之行而更制革弊以盡學者之才教育之方勤亦至矣有司其務嚴訓導精察舉以稱朕意學者其進德修業不失其時凡所科條可爲永式其令曰州若縣皆立學本道使者以屬部官爲教授三年而代選於吏員不足取於鄉里宿業有道業者三年無私遣以名

聞士須在學習業三百日乃聽預秋試舊常充試者百日而止親老無兼侍取保任聽學於家而令試於州者相保任所禁有七曰隱憂匿服曰常犯刑責曰行虧孝弟有狀可指曰明觸憲法而經贖罰或不經贖罰而爲害鄉黨曰籍非本土假戶冒名曰祖父犯十惡四等以上罪曰工商雜類或嘗爲僧道皆不得預進士試三場先策次論次詩通考爲去取而罷貼經墨義又以舊制用詞賦聲病偶切立爲考式一字違忤已在絀落使博識之士臨文拘忌俯就規檢美文善意鬱而不申如白居易性習相近遠賦獨孤綬放馴象賦皆當時試禮部對偶之外自有意義可觀宜詳倣唐體使馳騁於其閒士子通經術願對大義者試十道以曉析意義爲通五通

爲中格三史科取其明史意而文理可采者明法科試斷案
假立甲乙罪合律令如法意文理優爲上等此卽仲淹十事
之三也 丙子詔禮部貢院增天下解額總諸州軍凡增三
百五十九人詔遂爲額

慶歷六年賜進士五百四十人出身

賈黯謝仲弓田育王
存趙瞻孫圜熊本

皇祐元年三月進士馮京以下四百九十八人

馮京沈遵
以有官不得

爲第一遂降次名錢公甫李育文同
毛國華吳申呂大防范百祿孫幾

蓋軫象天地賦日辰不

暇食詩天聽君人之言論

皇祐二年十一月詔自今諸處無得申奏及遣念書童子赴

闕

寶元元年六月戊寅罷天下舉念書童子考

五年三月辛酉賜進士鄭獬等五百二十人及第二百零人出身獬安陸人也楊繪員正象天賦律聽軍聲詩樂本人心論滕甫楊美蒲宗

孟子無黨李清臣呂陶李定蒲宗閔楊古容錢藻

秋戊子詔禮部貢院自今諸科舉人並以四通爲合格凡經止問大義不須注疏全備其九經場數並各減二場仍不問兼經又詔試官親嫌令府監互相送若兩處俱有親嫌卽送別頭

嘉祐二年春正月翰林學士歐陽修權知貢舉先是進士益相習爲奇僻鉤章棘句寢失渾厚修深疾之遂痛加裁抑乃嚴禁挾書者及試榜出時所推譽皆不在選鬻薄之士候修晨朝羣聚詆斥之至街司邏吏不能止或爲祭歐陽修文投

其家卒不能求其主名置于法然文體自是亦少變

丁亥賜進士章衡等二百六十三人及第一百二十六人同

出身是歲進士與殿試者始皆不落

李復主紀聞云是春以進士辱歐陽修之故殿

試及第並不落一人當考民監賦鸞刀詩重巽申命論章衡寶卞鄭雅呂惠卿蔣之奇蘇軾曾肇朱光庭曾布宋希史元道王韶梁燾蘇惟賢蘇轍劉元瑜

十二月先是上封者言四年一貢舉四方士子客京師以待試者六七千人一有喧噪其徒眾多勢莫知禁且中下之士往往廢學數年才學之士不幸有故一不聽詔沈淪十數年或累舉滯留遂至困窮老死者甚眾以此毀仁冒法干進者不可勝數宜閒歲一貢中分舊數而薦之王洙侍講周禮至三三大比大考州里以贊卿大夫廢興帝曰古者選士如此

今經四五歲以下詔故士有抑而不得進者爲今之計孰若
裁其數而屢舉下有司議乃合奏曰閒歲之法無害有利不
足疑 戊申自今閒歲貢舉進士諸科悉解舊額之半進士
增試時務三條諸科增試大義十條又別置明經科其試法
凡明兩經或三經五經者各問墨義大義十條兩經通八三
經通六五經通五爲合格兼問論語孝經十條分八場出身
與進士等以禮記春秋左氏傳爲大經毛詩周禮儀禮爲中
經周易尙書穀梁傳公羊傳爲小經其習禮記爲大經者許
以周禮儀禮爲中經習春秋左傳者許以穀梁傳公羊傳爲
小經舊置說書舉合罷之其不還鄉里而寓戶他州以應選
者嚴其法每秋試自縣令佐察行義保任之上于州長貳復

審察得實然後上本道使者類式已保任而後有缺行則州縣皆坐罪若省試而文紙謬坐元考官又用孫抃奏諸州解試額多而中程少者不必足額

五年三月己卯三詔貢院所試詩賦經義並如舊制本志以爲楊察建是議而實錄但上封者言新制不便不出主名

六年四月進士一百八十三人

士者通天地人賦
明德清

民黃履劉奉世賈易江術孔
文仲韓忠彥王安禮張燾

八年三月賜進士許將等一百二十七人及第六人同出身

諸科二百四十七人及第同出身

許將范祖禹孔
武仲沈括呂陶

四月丙子又下詔乃其貢院申請卽本志所書楊察初議弘按察權判貢院初建此議當五年三月旣已施行八年四月

貢院復有申請其議則實察五月所建者在不知此時察仍判貢院或已罷爾今兩存之仍於此年依實錄不出察主名本志又於此詔後書張方平知舉請下詔辭賦新體拔方平以六年二月知貢本志誤矣初詔外州發解到省差官覆考尋罷之蓋慮思此或致折退寒士故也

夏詔科場舊條皆先朝所定宜一切無易時禮部貢院言四年宋祁等定貢舉新制會明年詔下且聽須後舉施行今秋試有期緣新制諸州軍發解但令本處官屬保明行實其封彌謄錄一切放罷見外解送舉人自未封彌謄錄以前多采虛譽苟試官別無請託亦先取本州曾經薦送舊人其新人百不取一封彌以後考官不見姓名卽須實考文藝稍合至

公又新制進士先試策三道次試論次試詩賦先考策論定去留然後與詩賦通定高下然舉人每至尙書省不下五七千人及臨軒覆較止及數百人蓋詩賦以聲病雜犯易去留若專取策論必難升黜蓋詩賦雖名小巧且須題命事若記問該富則辭理自精策論雖有問題其閒敷對多挾他說對不及五通盡黜之卽與元定解額不敷若精麤畢收則濫進殊廣所以自祖宗以來未能少更其制兼聞舉人經史疑義可以出策論題目凡四十條謂之經史質疑至於時務亦鈔撮其要浮僞滋甚若爲考試又舊制以詞賦聲病剝切之類立爲考式今特許倣唐人賦體及賦不限聯數不限字數且古今文章務先體要古未必悉是今未必悉非常觀唐人程

式試詩賦與本朝所取名人辭藝亦工拙相半近儒是古非
今不爲通論自三聖以來國子監生詩賦卽以汗漫無體爲
高策論卽以激訐肆意爲工中外相傳愈遠愈濫非惟漸誤
後來省試其合格能幾何人伏以祖宗以來得人不少考較
文藝固有規程不須變更以長浮薄請如舊制故降是詔

天聖七年置武舉皇祐元年詔罷之嘉祐八年樞密院奏以爲
文武二選所關治亂不可闕一與其任用不學無術之人臨
時不知應變以撓師律不若素習韜略頗閑義訓之事緩急
驅策可以折衝況今朝廷所用人稍有聲稱多由武舉而得
則此舉不可廢明矣卽詔兩制詳議所集舉業及較試取中
推恩之數兩制議請隨進士等科開設許在京管軍及正在

橫行使副知雜及三院御史諫官并轉運判官提刑三路知
軍州及路分總管鈐轄各奏舉一人試及武藝優者與殿直
次三班奉職殿直三班差使策不中而武藝絕倫者聖旨學
士賈黯又奏請如明經之制於太公韜略孫吳司馬諸兵法
及經史言兵事者設爲問目能用己意或引前人注釋辭理
明暢及因所問自陳方略可施行者爲通從之而令每開舉
則兵部至歲中具所舉人名數以聞明年三月命館職兩人
與判兵部同試策一道命馬軍司試弓馬武藝具所試等籍
送試官參校合格以名聞至八月則命官與判兵部同試策
於祕閣命直學士以上及正任或橫行使一人與軍頭司試
弓馬武藝以所試等第籍送祕閣試官參考合格者以名聞

九月丁卯遂詔復置武舉蓋嘉祐八年始議治平元年九月議定乃降詔其降詔因緣密院建請非治平元年九月方建請也

英宗

治平元年五月己巳禮部奏鄉貢進士李加言等伯父爲道士而死請比外繼降服大功九月許其應舉

二年二月賜進士彭汝礪等三百六十一人及第出身汝礪

等三人授初等幕職官如咸平年例彭汝礪章棗張商英舒亶孔平仲孫漸

四年五月進士一百六十五人堯舜性仁賦求遺書於天下詩易簡得天心之理論

劉揮胡宗愈安
壽劉摯章惇蔡確

二月庚寅詔禮部貢院曾經御試五舉諸六舉進士省試六舉諸科七舉年五十以上者具以名聞

四年賜進士許安世等三百五十人分四等自此三歲一舉

許安世宋敏邢思黃庭堅司馬光權知貢舉

三年冬十月丁亥詔曰先帝以士久不貢則怠于學而豪傑

者不能久待故下閒歲之令冀以得人而自更法以來其弊

浸長何者里選之牒仍故而郡國之取減半計借之籍屢上

而道途之勞良苦朕甚閔焉其令禮部三歲一貢舉天下解

額於未行閒歲之法已前率四分取三分禮部奏名進士以

三百為額明經諸科不得過進士之數本志云自是恩典不增而貢舉緩士得休

息官以不煩矣權知貢舉司馬光上言所考試合格進士許安世以

下三百五人分四等明諸經科二百一十一人三等詔進士

第一第二第三等賜同出身明經諸科第一第二第三人並

爲防禦團練推官其餘注官守選如例

神宗

熙寧三年知貢舉王珪上合格進士陸佃等先是知舉呂公

著在貢院中密奏言天子臨軒策士而用詩賦非舉賢求治

意乞出自宸衷以諮訪治道 己亥上御集英殿進士初就

席有司猶給禮部韻及試題出乃策問也上顧輔臣曰對策

亦何以盡人才然愈於用詩賦取人爾旣而遂賜葉祖洽及

第司馬光目錄曰時韓維呂惠卿初考附會者皆在高等言

直者多在下等宋敏求劉邠覆考及之吳充陳襄從初考

祖洽言祖宗多因循苟且之政陛下革而新之初考爲三等

中充等奏乞勿考呂公擇蘇軾編排上官均等一祖洽二佃
第五程堯佐奏名第三以陸佃知新法故升第二云爲第
五是歲進士二人直詆時病皆在下開封范越一不知名

四年二月丁巳朔頒舉校貢舉新制先是王安石謂更學校

貢舉之法詔兩制三館議之司馬光時爲翰林學士卽應詔
上議直史館蘇軾亦議曰準敕講求學校貢舉利害令臣等
各具議狀聞奏者右臣伏以得人之道在于知人知人之法
在于責實使君相有知人之明朝廷有責實之政則胥吏卓
隸未嘗無人而況于學校貢舉乎雖因今之法臣以爲有餘
使君相無知人之明朝廷無責實之政則三公侍從常患無
人況學校貢舉乎雖復古之制臣以爲未足夫時有可否物
有廢興方其所安雖暴君不能廢及其旣厭雖聖人不能復
故風俗之變法制隨之譬如江河之徙移順其所欲行而治
之則易爲功強其所欲而復之則難爲力使三代聖人復生
於今其選舉賢才亦必有道矣何必由學乎此法行之百年

治亂盛衰初不由此陛下視祖宗之世貢舉之法與今爲孰
精言語文章與今爲孰優所得文武長才與今爲孰多天下
之士與今爲孰辨較此四者短長之議決矣今議者所欲變
改不過數端或曰鄉舉德行而略文章或曰專取策論而罷
詩賦或欲舉唐室故事兼采譽望而罷封彌或欲罷經生樸
學不用貼墨而考大義此數者皆知其一不知其二者也臣
願陛下明敕有司試之以法言取之以實學博通經術者雖
才不廢稍涉浮誕者雖工必黜則風俗稍厚學術近正庶幾
得忠實之士不至蹈衰季之風則天下幸甚議上上曰吾固
疑此得蘇軾議意釋然矣至是卒除聲律專意經義罷明經
及諸科立新制如安石請其新制曰中書言今貢舉新制進

士罷詩賦各占治詩書易周禮禮記一經兼以論語孟子每
試四場初本經次兼經并大義十道務通義理不須盡用注
疏次論一道次時務策取諸科解名增解進士以熙寧二年
解明經數爲率如舉人數多於熙寧二年卽每十人更取諸
科額一人諸科額不及三人者聽依舊每二十如十人法禮
部奏名於諸科解額取十分之三增進士額京東陝西河北
河東京西進士開封國子監諸路嘗應諸科改應是科者別
作一項考校其諸科內取到分數並充進士奏名將來科場
諸科宜令依舊應舉候經一次科場除舊人外不得應諸科
舉五路先置學官中選書擇逐路各三五人雖未仕有經術
行誼者亦許權教授給下縣主簿尉俸願應舉者亦聽候滿

三年有五人奏舉堂除本州判司主簿尉俸依舊兼授即經
衙行誼卓然爲士人所推服者除官充教授其餘州軍並令
兩制兩省館閣臺諫官僚屬薦舉見任京朝官選人有學行
可爲人師者中書體量堂除逐落官令兼本州教授諸州進
士不及二百處轉運司并鄰近三兩州考試仍各用本州
解額殿試策一道限千字以上分五等第一等第二等賜及
第第三等第四等同出身第五等同學究出身

六年正月知舉曾布上合格進士邵剛等 己酉乃御集英

殿策試遂賜余中

李夷行陳唐管
師仁管師漸

等四百人及第出身

是年
罷詩

賦賜期集
錢三十貫

九年三月辛酉御集英殿策試遂賜徐鐸以下四百三十九

及第出身館第五請依舊賜進士出身無以同學究恥之不

從縮後再言卒從之初命縮知舉時專以經取士前史興亡

治亂之蹟學者莫得習縮於策問悉訪史學至是奏進士張

噤等合格號為得人事已縮入對上曰卿以史學問矯學者

可謂舉其徧矣

徐鐸李格非邵洵武楊洵劉勃鄧洵仁安淳

元豐二年春丁亥詔以經義論試宗室

二月辛未知舉許將上合格進士朱浚明等

殿策試遂賜

時彥陳權朱浚明晁補之家彬張康國

等三百四十八人及第出

身是時免試刑法

五年三月知舉李清臣上合格進士劉槩等

殿策試遂賜

黃裳劉槩張馴李西美余深鄒浩三石解馮澥程庚楊响禾楊庭傑

等五百九十

人及第出身槩開封人裳劍浦人也裳初考下等上親擢爲
第一考官蘇頌等各罰金

八年丁亥三省言禮部貢院火試卷三分不收一分欲令禮
部別鑰試從之

三月兵部侍郎許將給事中兼侍講陸佃祕書省監孫覺並
權知貢舉以遺火再試也

夏四月己巳詔再試進士及諸科武舉人罷今年御試內應
直赴殿試者以前舉省試等第名次編排在今來正奏名之
下不曾赴省試者卽與正奏名進士同場別號試策一道

五月乙未禮部言貢院以合格進士鄭弈江嶼劉正夫太史
章祀究王諱駁放 丙申太皇太后曰此舉人亦未通知特

與收錄蔡確曰法當黜以事初過誤恕之足彰盛德乃聽例
依附榜末詔科場推恩依治平四年故事正奏名進士諸科
吏部給優牒特奏名中書給敕告優熙寧中悉罷今復之

丙申賜劉逵等五百七十五人

徐處仁謝良佐白時中鄭居
中薛昂正常孫漸劉洵仁王

衰侯蒙劉
正夫宋鼎

並釋褐武舉進士並賜袍笏銀帶逵隨州人

是年
狀元

本焦貽
蹈卒

哲宗

元祐元年閏二月尚書省言禮部以掌貢舉爲職伏見朝廷

用經術設科蓋欲人知禮義學探原本近歲以來承學者多

聞見淺陋辭格卑弱其意在於治經者專守一家而略去諸

儒傳記之說爲文者唯務解釋而不知聲律體要之學深虞

人才不繼而適用之文從此遂熄欲乞朝廷於取士之法更與裁定 又禮部言乞置春秋博士及進士專爲一經 又侍御史劉摯言伏見國朝以來取士設科循用唐制進士所試詩賦論策行之百餘歲號爲得人熙寧初神宗皇帝崇尚儒術訓發義理以新人才謂章句破碎大道乃罷詩賦試以經義臣愚欲乞試法復詩賦與經義兼用之進士第一場試經義第二場試詩賦第三場論第四場策經義以觀其學詩賦以觀其文論以觀其識策以觀其才前二場爲去留後二場爲名次又言近制明法舉人試以律令刑統大義及斷案謂之雜科明法登科者吏部將司法員闕先次差注在進士及第人之上臣以謂宜有更張欲乞雜科明法並加論語孝

經大義登科之額裁減其半及注官之日並依科目資次所
貴從事於法者稍不遠義而士之流品不失其分伏望聖慈
裁酌如賜開允卽乞今年降詔並自元祐五年秋試爲始詔
禮部與兩省學士待制御史臺國子司業集議聞奏所有將
來科場俱依舊法施行
三月司馬光言伏覩朝廷改科場制度奉聖旨令禮部與兩
省學士待制御史臺國子監司業議聞奏臣切有所見不敢
以不聞凡取士之道當以德行爲先文學爲後文學之中又
當以經術爲先辭采爲後神宗皇帝悉罷詩賦及經學諸科
專以經義論策試進士此乃革歷代之積弊復先王之令典
但王安石不當以一家私學欲蓋掩先儒今天下學官講解

及科場程試同己者取異己者黜又黜春秋而進孟子廢六藝而尊百家加之但考校文學不勉勵德行此其失也今國家大議科場之法欲盡善矣以臣所見莫若依先朝成法合明經進士爲一科立周易尙書詩周禮儀禮禮記春秋孝經論語爲九經令天下學官依注疏講說學士博觀諸家自擇短長各從所好春秋止用左傳其公羊穀梁陸淳等說並爲諸家孟子止爲諸子更不試大義應舉者聽自占習三經已上多少隨意皆須習孝經論語於家狀前開坐習集某經臣愚所見如此伏乞以臣所奏及禮部等官所議榜國子監門及徧下諸州有州學處榜學門令舉人限一月內投狀指定何法爲善仰本州附遞以聞候到京齊足更委其它執政看

詳參酌從長施行先是光以奏藁示范純仁純仁答曰孟子
恐不可輕猶黜六經之春秋矣更乞裁度光欣納之
左司諫王巖叟奏臣竊爲庠序者所以萃羣材而樂育之以
定其志業養其名譽優游舒徐以待科舉也不必科舉之外
別開進舉之名多歧以支離其心而激其爭端使利害得失
日夕戰於胸中損育德養道之凜意非所以篤教化育人材
也臣愚乞鑒已然之弊罷三舍法開先生弟子不相見之禁
示學士大夫以不疑講解之餘止以公私試第其高下如昔
時自足以獎材氣而厲風聲使多士欣欣於從學則上庠而
復有雍容樂易之美爲四方矜式矣乞下禮部及司業博士
共議

右司諫蘇轍言臣伏見禮部會議科場欲復詩賦議

上未決而左僕射司馬光言乞以九經取士及朝官以下保
任舉人爲經明行修之科至今多日二議並未施行臣切惟
來年秋試自今已往歲月無幾而議不時決傳聞四方者知
朝廷有此異議無所適從不免疑惑懣亂臣欲乞先降指揮
明言來年科場一切如舊但所對經義兼取注疏及諸家議
論或出已見不專用王氏之學仍罷律義令天下舉人知有
定論一意爲學以待選試然後徐議元祐五年以後科舉式
未爲晚也從之 先是言者謂專用詩賦盡黜經義太學生
改業者十四五監察御史上言均言經術以理爲主詩賦以
文爲工以理者於言爲實而所根者本以文者於言爲華而
所逐者末先帝革去數百年之弊不爲不艱而議者不計本

末乃欲襲前日詩賦之弊未見爲得也願陛下詳審而聽行之又言請令學者各占三經雜以論孟不必專用新義試策二道一問歷代一訪時務禁用釋典不得專據莊老比於專用詩賦使學者弊精神於無用之文得失固相遠矣章三上又爲六說以闢言者其後詩賦以經義訖並用云

四月辛亥詔每遇科舉詔下令文官升朝以上無贓罪及無私罪者於應進士舉人不拘路分不係有服親各奏舉經明行修一名候將來發解及南省奏名內每人名下注經明行修字至殿試唱名各升一甲姓名如歷官後犯正人已贓及違犯名教斷訖收坐舉主並依舉選人轉京官減一等先

是司馬光言昨已有朝旨來年科場且依舊法施行竊聞近

有聖旨其進士經義並兼用注疏及諸家之說仍罷律義先
次施行臣竊知朝廷之意蓋爲舉人經義文體專習王氏新
學人務起而集之臣所乞置經明行修科者欲使舉人趨向
云科場敦尙行義不專取文學所以美教化厚風俗比於經
義文體尤有切要宜使舉人預知欲乞亦降朝旨先次施行
況與進士舊法兩不相妨
十一月三省奏立經義詞賦兩科下議從之
二年四月丁未詔制科之設舊矣自西漢之世始詔有司詳
求俊茂親臨策問受其條對故天下魁偉絕特之材守經自
重之士得以並進而讜言正論益以上聞自斯以來歷世用
之逮乎祖宗以神聖文武繼繼承承設六科之選策三道之

正以綱維天下賢俊百餘年間號稱得人先皇帝興學校崇
教術以作新人才變天下之俗故科目之設有所未遑今天
下之士多通於經術而知所學矣宜復制策之科以求拔俗
之才裨於治道今復置賢良方正能直言極諫科自今年爲
始令尙書侍郎兩省諫議大夫以上御史中丞學士待制各
舉一人不拘已仕未仕以學行俱優堪備策問者充仍具辭
業進餘依舊制

十一月庚申三省奏檢會元祐元年閏二月二十二日指揮
將來科場且依舊法施行四月十二日指揮仍罷律義六月
十二日指揮今來科場程試不得用字說並用古今諸儒之
說或已見卽不許引用申韓釋氏之書考試官不得於老莊

子內出題舉經明行修人京東京西河北陝西路各五人淮南江南江東江西福建河東兩浙城都府路各四人荆湖南廣東西梓州路各二人荆湖北夔州利州路各一人委州縣當職官同保狀任申監司監司再加考察依上項人數聞奏仍於發解前牒報本州充本州解額赴省試無其人則闕上件逐次朝旨並已施行外今欲依項下一考試進士分爲四場第一場試本經義二道論語或孟子義一道第二場試律賦一首律詩一首第三場論一首第四場問子史時務策三道以四場通定去留高下一新科明法依舊試斷案三道刑統義五道添論語義二道孝經義一道分爲五場仍俟元祐五年秋試施行其諸路舉到經明行修之人如省試不合格

即未得黜落別作一項奏取旨揮從之

三年二月監察御史趙挺之言貢舉用三經新義取人近二

十年今聞外議以謂蘇軾主文意在矯革若見引用新義決

欲黜落請禮部貢院將舉人引用新義注疏文理通行考校

詔送貢院照會又詔殿試經義詩賦人並試策一道從挺之

請也呂公著家傳云初公著在仁宗朝嘗請進士先策論神宗初又獻議以經術取士及知熙寧三年貢舉遂密請

臨軒專用策試未幾公著以言青苗等事得罪去至是特廷

試執政之以熙寧復策之初進士葉祖洽議譏祖宗自後對

策者詆前朝以阿當世因以為策問可廢當復詩賦論公著曰

天子臨軒發策延四方貢士詢以治道豈非近古良法耶至

於對者之是非邪正則在考官去取爾乃復舊試策
三月丁巳御集英殿試進士丙戌午試特奏及武舉進士
庚申試諸科及奏特名人京癸亥試武舉進士射藝於崇政

殿惟恩補官十有五人詔罷及考核祖宗免親試法日錄云宗室自

熙寧後稍知向學故科舉比進士少寬乃分考以爲別便知勇向學至是罷去己巳賜進士李

常寧劉壽章援楊彭史愿史通范致虛費貢等二十四人及

第二百九十有六人出身一百八十有八人同出身內宗室

子湜爲承務郎馱爲承奉郎諸科明經七十有三人各賜本

科及第出身同出身有差庚午賜特進奏名進士武舉諸

科進士經明行修王鄰臣等同五經三禮學究出身假承務

郎京府助教諸州文學助教右班殿直三班奉職借職差使

凡五百三十有二人甲戌增賜新釋褐進士錢百萬酒五

百壺爲期集費

六月庚辰詔將來一次科場如有未習詩賦舉人許依舊法

取應解發合格人不得過解額三分之一應解官人者均取卽有零分及解額一人者並通取文理優長之人

九月九日三省同奉聖旨令尙書侍郎學士待制兩省御史臺官國子監長貳疾速詳議聞奏臣等伏以天子親策貢舉自漢以來未之有改唐之進士雖試詩賦然惟有司奏行而已國朝開寶六年太祖始召進士親試於廷當時公卿不知建明易以策問而唯詩賦之用因沿著令莫之能改神宗皇帝以爲非天子臨軒所以延見貢士詢求治道之體熙寧三年始改策迄於元豐五年賜策問臣等以謂學校教諸生州郡發解禮部考貢今已悉用詩賦足以審其辭所有御前進士宜一依先帝故事試策合於體於古爲允

十月傅堯俞等準元祐三年九月九日敕中書省臣僚上言
將來殿試宜卽用祖宗試三題之法并乞賜論語中外之士
十一月中書舍人彭汝礪言臣準禮部牒奉旨令兩省兩制
同共看詳修立到考校詩賦并格式聞奏臣伏念先皇帝受
天明命悼道之鬱滯奮於獨斷初用經術造士以革數百餘
年之弊士知本且知方而議者獨病辭章之不工欲踵隋唐
之弊法狎玩經說口蠹道真學者疑之臣考於心驗於古參
於今反覆曲折終未見其可臣愚以爲今學校選舉宜一用
元豐條約令經明行修賢良方正之科而稍加損益焉蓋亦
庶幾矣如詩賦決當寢罷臣涉道淺陋不足以偏辭獨見弗
眾人之所同是否朝廷已行之法必未能改爲更乞下學士

大夫詳議可否以求其中庶幾是非好惡有所歸宿

閏十二月御史中丞李常侍御史盛陶殿中侍御史翟暨監察御史趙挺之王彭年言臣等近者累次論奏乞以經義別爲一科今與詩賦科並行均取者蓋以見行科場詔條將來一次科場如有未習詩賦舉人許依舊法取應解發合格人不得過解額三分之一以此觀之則是朝廷更無用經術設科取人之理止以舊人未習詩賦且於將來一次科場量以分數收取而欲陰消之故也臣等所以區區者非特爲舊習經義舉人頓然失業爲言且以上之好惡不可不謹以義理論之則以經術勸士爲先聲律爲下以教化言之則通經術者爲利溥事聲律者爲害大竊今聞太學生與四方之士觀

望朝廷意旨皆不復治經旨凡於義理之書一皆斥而不談
博士所講與其父兄之訓不復更及高遠羣居切磨惟以論
聲韻調平側事屬對較比擬以輕巧靡麗爲務此臣等所以
慮道術日衰以就廢絕將復如唐末五代時學士智識淺陋
此有智之士固多太息而流涕也臣等今采之輿議欲以經
義詩賦各設爲科一經義進士科欲試四場試經義六道每
經二道欲以易書詩春秋禮記周禮內第一場各題一道第
二場各出題一道又許占對三經以古今注疏及已見所長
文理通贍者爲合格不得如舊日止記誦一家之義第一場
試經義三道每經一道共五道第三場試論一首第四場試
策三道並問子史時務一詩賦進士科試四場第一場試詩

賦各一首第二場試經義四道出題同第一場人許占對一
經試本經三道論語孟子一道第三場試論一首第四場試
策三道並問子史時務右伏望聖慈深惟國家教化之大陶
冶人物之重四海執經之士十八萬人仰候令之所向詔以
臣等愚言付之有司如或不謬特降指揮不勝幸甚明年四
月八日詔應進士不兼詩賦人許依舊法取應增治一經增
減試一場常等此奏乞存留經義一科並行均取豈朝廷果

嘗欲廢經義科乎

當考

四年夏四月禮部言經義詩賦進士聽習一經第一場試本
經義二道論語或孟子義一道第二場賦及律詩一首第三
場論一首第四場子史時務策二道經義進士並習兩經以

詩禮記周禮左氏春秋爲大經周易公羊穀梁儀禮爲中經
願習二大經者聽卽不得偏占兩中經其治左氏春秋者不
得以公羊穀梁爲中經第一場試本經義三道論語義一道
第二場試本經義三道孟子義一道餘如何並以四場通定
高下去留不以人數多寡各取五分卽令分額及元額解一
人者聽取辭理優長之人從之
初八日并十九日 新紀
戊午立試進士四場法
十一月十二日已立四場法己未詔元祐二年以前諸科舉
人改應新科明年法聽取應外自今更不許改其獲冒應人
仍增舊賞從禮部刑部請也

十二月禮部言諸路申請貢舉敕經義兼試詩賦進士及經
義進士解額各取五分竊慮兩科者不齊拘定五分則似未

盡乞行拘取看詳進士兩科試法不一舉人互有輕重難易
之論兼試人數不定則解額難以均當終非通法不可久行
詔來年科場以試畢舉人分數均取後一次科場其不兼試
詩賦人解額並依元祐三年六月五日所降朝旨如未習詩
賦人許依舊法取應合格人不得過額二分之一已後並依
元祐二年十二月十二日敕命考試進士分爲四場試本經
義二道論語或孟子義一道第二場試律賦一首律詩一首
第三場試論一首第四場問子史時務策三道以四場通定
去留高下內仍減時務策一道

五年十一月右正言劉唐老言請治經舉人以大義定去留
詞賦而兼經義者以詩賦定去留並以策論定高下仍依舊

分經考從之殿中侍御史上官均言自祖宗以來固欲兼用詩賦未聞專以詩賦去留也而言者以爲治平以前詞賦取士則去留主以詞賦熙寧以後經術取士則去留主以經術又以爲緣非不輕考校故當時定四場取之制不亦過歟言者以爲主司已自有四場通定之文所主不一各隨習尙互爲升黜臣以爲學者所習各有所長四場程文各有優劣惟所主不一取其優長故無遺才雖各隨習尙互爲升黜又何害耶今就專以詞賦去留若賦不合格則義策論雖精深閱贍不可復取如此則博學能文之士所失多矣伏望依元祐一年條制以四場通定去留高下庶幾無失人之弊

六年春正月己巳翰林學士知制誥兼侍講范百祿權知貢

舉詔五路進士及諸科明法人就試終場零分不滿十人許
解一人仍取文理優長以尚書省言通利軍等處將終場十
人以下零數添解一人不應元祐貢舉故有是詔 己巳集

英殿試禮部奏名進士 庚午策試正奏名進士及武舉

壬申試明經諸科律科并雜科特奏名人 壬午御集英殿

賜進士諸科馮涓以下及第出身假承務郎文學等 馮涓宋
絳張庭

聖吳時蒲子之孫曾楊縮蘇道孫近
孫漸杜謨施訪侯剛李稅劉干之 總六百有二人涓閩中

人也 癸未賜特奏名進士諸科劉必以下同出身假承務

郎京府助教文學州助教三百二十三人武舉進士賈君文

等三十三人 乙酉延和殿太皇太后宣諭曰今歲御試考

校定後兩日方唱名於內中火禁非便其令自今後具考試

次第旋定唱名日 壬寅給事中范祖禹言左諫議大夫鄭
雍奏貢舉條程文經義每道不得過五百字策不過二分雖
合格並降一等今辭詞優長者往往過數用舊制自發解至
御試文字並不以過數爲限廣收閎博之儒以副詔科之意
令禮部詳定聞奏竊謂對策不當立限眾所共知理無可疑
不必更令禮部詳定乞並用舊制詔今後對策過二分更不
降等惟經依前降指揮祖禹又封還以爲不可其後卒亦不
能行也

七年夏四月甲寅左正言姚勳言先帝表章聖學一用經術
取士欲以大道於變斯文然議者以謂師用一家之說習以
成弊不能貫通是以前日明詔復用詩賦此固陛下開廣育

材之路求賢取士之深意也然臣切見舉士自復詩賦以來於今五六年頗未能工者就詢其由良亦有說蓋今貢舉之法習詩賦者仍試經義既學者期於必得則務在兼通至有司責其俱優則必無盡善若用意散漫則俱不能精儻志在偏長則必有一短臣欲望朝廷並言詩賦經義各爲一科隨所試人數多少均爲取士之格如此則永遠可行而學者專精一藝易見成就惟陛下裁擇

又云四月二日敕臣寮上言近覩科場限制字條制不便再具論列乞今後賦論策經義並不限字數今已得旨策過二分更不降等而賦論經義未蒙指揮臣之愚以謂朝廷以言取士而禁其多言未應古義且非聖朝取士之良法往時開封舉人路授倡長賦幾千

言但爲浮辭不求典要當時能文者往往效之得張方平擯
斥其文遂正嘉祐初劉幾輩喜爲怪僻句得歐陽修革去而
其風復雅但係主司之風化耳今朝廷立法不問其文之澆
凜而校其字之多寡責其不及猶有勸懲禁其多文殊無義
理伏望朝廷更賜詳酌詔詩賦論二分並不降等其經義文
理優長者準此

五月癸巳詔祕閣試制科論題於九經兼正史孟子楊子荀
子國語并注內出其正義內毋得出題
六月甲子置廣文閣解禮部狀近準都省批狀勘會開封府
遇科場歲多有四方舉人冒貫幾縣戶名取應及太學生員
依條須在學及一方方預就試其間有未及一年之人亦不

足有寄貫取應之弊檢會舊制國子監取應舉人先於廣文館補試給牒取應令欲復置廣文館生員送禮部看詳立法申尙書省禮部檢校貢舉敕進士解額開封府一百人國子生四十人其諸科依舊條開封府二百四十人本部昨已曾乞將諸科量留四十人解額外其餘二百人並開封進士及國子生共爲三百四十人發解廣文館生員今再行看詳開封府進士解額一百人卽乞依舊外將本府諸科二百人並國子生四十人共二百四十人解額並撥屬廣文館以補中生員每十人發解一人從之

八年二月御史中丞李之純言比歲朝廷十科學士之令蓋已行之累年近臣所薦者多而拔用甚少乞委輔臣詳擇稍

稍進任其智勇過人可備將帥科多是武臣推舉其類科必
有可用之人宜加考察

三月庚子中書省言進士御試答策多係在外準備之文工
拙不甚相遠難於考校祖宗舊制御試進士詩賦論三題施
行已遠前後得人不少今朝廷見行文字多係聲律對偶非
學問淹洽不能成章若朝廷不復行祖宗三題舊法則學者
未知朝廷所向檢書已降指揮將來一次科場如有未習詩
賦舉人許於舊法取應解發分格人不得過解額三分之一
以後並兼試詩賦詔來年御試將詩賦舉人復試三題經義
舉人且令試策此復全試三題其雜犯舉人未得黜落別作
一項聞奏

五月癸卯禮部尙書蘇軾言伏見元祐貢舉敕諸詩賦論題於子史書出如於經書出而不犯見試舉人所治之經者聽今相度欲乞詩賦題許於九經孝經論語子史並九經論語注中雜出更不避見試舉人所治之經但須於所給印紙題目下備錄上下全文並注疏不得漏落則本經與舉人所記均一更無可避兼足以示朝廷待士之意本只以工拙爲去取不以不全之文掩其所不知以爲進退於忠厚之風不爲無補詔依奏今來一次科場未得出制度題目

紹聖元年春正月戊子禮部言諸州軍就試進士及千人以上差點檢試卷官二員每增五百人添一員人數雖多不過六員從之

丁酉蔡安持言貢舉敕五百人以上差點檢官

一員千人以上差二員既舉試官分定考試又獨力點檢試卷實恐力有不逮若以犯不考試卷爲合格止坐點檢官獨試官無責必不加意考校顯見條約交互未爲均便欲乞除在京外於貢舉敕內改點檢官爲考試官字所貴五百人以上添官考校同心合議參定去留士無遺濫從之

三月丁丑詔今次御試舉人依舊試策 庚辰監察御史郭知章言復元豐上舍推恩之例以廣樂育之盛德詔太學合格上舍生上等推恩免省試每次科場不得過二人仍附春榜人數 乙酉上御集英殿進士策復詞賦之選而士不加能勸常平之官而農不加力可富可口之說雜而役法病或東或北之論異而河患滋賜士以柔遠也而羌夷之侵未弭

弛利以便民也而商賈之路不通至於吏員猥多兵備剗缺
饑饉薦至寇盜尙蕃此其何故也夫可則因否則革惟當之
爲貴人亦何心焉子大夫其意陳之毋隱中書侍郎李清臣
之詞也 乙未三省言擬到武舉人推恩策入優等上三人
與右班殿直四人以下與三班奉職減三年磨勘武藝絕倫
更減二年磨勘上舍更減二年磨勘不入等與三班差使減
年磨勘不入等與三班差使減年磨勘有差從之 丁酉上

御集英殿賜進士

畢漸唐寅趙克劉藝王孝迪程畬
楊皓唐恪呂頤浩張綱李天任

漸等以

下通禮諸科經律及第出身者六百人時初官考取答策者

多主元祐楊畏覆考專取主熙寧元豐者故漸爲之首

四月壬申殿中侍御史許亮采言罷十科貢士法從之

三年秋七月乙卯國子司業龔原言將來科場只令依古專治一經從之

四年春正月知貢舉給事中徐鐸起居郎沈銖同知貢舉蔡

言給事權官附月末

二月庚辰詔罷春秋古本云詔罷春秋科先帝以經術進士而春秋不設科以魯史亡有不可考士

不能通故也元祐又設今罷之新錄辨云不設春秋科本王安石偏見私意也

閏二月己酉御集英殿禮部奏名進士葉夢得程經楊鳴志何昌言謝克家呂天

惠

三月甲子御集英殿放特奏名進士及諸科並武舉人內謝

師古本貫鬱林州陳漢奇本貫高州詔以遠人各賜絹二十

匹李維岳以高年賜絹一十四匹是日未啟封看三人程文至

第四人展讀千百字曾布與蔡卞俱云文字顯不如第三人恐不須讀啟封乃章惇之子持也至第五人宣諭云對策言先朝法度當損益可降布曰事有適於時變於人情固當損益恐無可降之理使先帝在位至今有可增損亦當隨宜損益翰林學士承旨蔡京達曰先帝則當損益陛下方紹述先志不當損益布曰恐無此理上顧卞曰如何卞曰不知如何損益京曰但言事合損益者不可不損益布曰如此乃是卞亦默然上曰更不須降然卒降第七人及啟封則李元膺乃察之子也布又曰第二人方天若程文中言元祐大臣當一切誅殺又言子弟當禁錮資產當籍沒古今政事無義理此姦人附會之言不足取上曰只是敢言布曰此有所憑恃非

敢言也天若乃蔡京門客上曰不知布曰前放榜一日章惇問臣曾諭否布曰不聞惇曰有一舉人論元祐人當誅上甚稱之既而林希爲臣言此方天若及於放榜惇亦對蔡卞言惇知此必天若卷子臣曰恐是惇曰何恐之有決知是天若也上乃曰惇何以知之布曰非天若不敢爾惇所以知之況京乎林希曰天若在京家安下布曰惇每言人臣不敢欺罔此誠至論陛下深居九重若容人臣欺罔何所不至如天若欺罔孰大於此上頷之天若興化軍人也

元符元年冬十月壬辰三省考試所試宗室文字合格者八人詔各遷秩內士疎仍賜進士出身

三年二月己丑知舉徐鐸上合格進士 庚寅詔貢院就放

李釜

范志明張邦昌孫宗監孫安國黃潛善毛友童王安中孫薄等

以下五百五十人及第

出身釜大名人也

徽宗

建中靖國元年二月都水監丞李夷行乞復詩賦科與經義

並行彭汝霖劾夷行非所宜言且云若不懲戒則議欲壞神

宗法度者將接踵而起左僕射韓忠彥收其章不行汝霖又

言陛下方以繼志述事為治專用經術取士而夷行狂瞽妄

說儻不明降指揮則天下不知禁夷行遂罰金

崇寧元年七月辛亥詔進士勿治春秋

崇寧二年三月知舉安惇上合格進士李偕等

英殿策試初賜霍端友蔡佃宇文粹中王賞彭俊民楊時汪

丁亥御集

藻王次翁王庚劉湜史汝士任稼孟庚任居實汪伯彥張守
等以下三百三十八人及第出身端友武進人階深之子而
陳瓘甥也時特奏名安忱對策言使黨人之子階魁南宮多
士無以示天下遂奪階出身而賜忱第惇兄也又黃定等十
八人皆上書上臨軒召謂之曰卿等攻朕短也神宗哲宗何
負於卿等亦並黜之

三年十一月甲戌幸太學及辟雍司業吳綱蔣靜各遷一秩
官論定之士鄭南程振朱丁葉祖義汪至平林徽之等十六
人學官推恩有差南侯官人也

四年九月乙卯御崇政殿賜上舍生俞棗邦方朱勝非楊邁
等以下三十五人及第出身棗江寧人也

冬十月丙辰置諸路提舉學事官羅靖雜記曰崇寧三年罷
科舉三年歲貢法成三舍天下教養人爲士二十一萬餘員
爲屋九萬二千餘楹費錢三百四十萬餘緡米五千五百餘

石

五年二月辛丑知舉朱謨上合格進士吳侗等
癸卯御集

英殿策試遂賜蔡疑唐紹楊郁滕庾劉亮李南強蘇元老胡
世將王韶劉觀師丙馬熙載王鈞宋輅吳涓楊廣李光徐銳
杜充趙鼎等以下六百七十六人及第出身侗烏程人疑開
封人也

十一月己丑大司成薛昂言武士之制未備請倣文士爲升
貢之法己巳詔從之

大觀元年六月癸酉御集英殿賜上舍生李邦彥段拂等以
下二十九人及第邦彥河內人也初懷州教授眉山任諒試
諸生邦彥每中優等至是果第一諒嘗作新學記上重其文
有旨取以入上曰文士也遂擢提舉夔路學事
二年知舉余深上合格上舍生 戊寅御集英殿賜王侯以
下十三人及第候成都人也
三年三月庚戌御集英殿策試遂賜賈安宅楊渾唐重聶山
史直之孫高李昉文彥奇孫癰史祖道任穎宇文黃中史旂
李天民史與權以下六百八十五人及第出身安宅烏程人
也先是中書侍郎林攄唱進士第而姓甄而呼堅名益而呼
快於是中丞石公弼論攄不學無術傳笑中外

夏四月戊寅罷攄知滁州

四年三月先是知舉王圖南上合格上舍生丙寅御集英

殿賜劉日新以下十五人及第日新麗水人也

政和二年二月壬子知舉蔡疑上合格進士路允迪等

三月己巳御集英殿策試遂賜莫儔程洵武万俟卨李從史

易用唐允彰張乘宋昌史與權王純仁石有中余堯佐師與

史機孫延宋朝英楊師錫王資孫坦程林呂天覺王升許允

等以下七百一十人及第出身允迪應天人儔餘杭人也

初御史李章言作詩害經術自陶潛至李杜皆遭譏詆詔送

敕局立法宰臣何執中遂禁人習詩賦至是儔榜不賜御詩

而賜箴未幾知樞密院吳居厚侍御經筵進詩爲改口號後

聖作屢出土大夫亦不復守禁矣

二年三月壬子知舉俞橐上合格上舍生

癸酉上御集英

殿賜陳公輔胡松年胡與義等以下十九人及第公輔天台人也

四年二月庚戌知舉張克公上合格上舍生

丁巳御崇政

殿賜張綱蔡居中汪萬頃以下十七人及第綱金壇人也初克公與同知舉霍端發宇文粹中皆太師蔡京所不喜者時中丞蔣猷劾貢院必有違法邀名之事下開封尹王詔體量得知舉聯名書曉示一事以為邀名而門下侍郎余深言曉示書名以結兩學之心此風不可長克公因以對自辨上言祖宗朝有三元今張綱有四元克公等又奏綱凡五魁多士

及是唱名侍立上以爲得人知舉官有賞於是深語塞而猷亦色變焉

五年二月知舉王黼上合格貢士傅崧卿等三月己卯御集英殿策試遂賜何棨馬守傅中行秦檜宇文袞純郭封呂大受賀允中史渠田孝孫等以下六百七十人及第出身崧卿山陰人棨仙井人也

六年三月壬寅知舉慕容達上合格上舍生 癸丑御崇政殿賜藏瑀以下十一人及第瑀鄱陽人也

七年三月甲辰知舉蔣猷上合格上舍生 庚戌御集英殿賜景徹以下十二人及第徹永康人也

八年二月己卯知舉陸德先上合格進士何大圭等

三月戊戌御集英殿策試有司考加王楷在第一上不欲令
魁多士遂賜王昂周天衢周望孫之才楊裕師成石粹中湯
朋舉任銳師庚程敦臨史似史充張彥等以下七百八十人
出身大圭晉陵人昂開封人也

宣和元年三月己未知舉陸德先上合格上舍生程文高下
失當乃別求升降辛未御崇政殿賜王俊義以下五十四
人及第俊義海陵人也

二年二月知舉王孝通上合格上舍生程文 三月壬寅詔
貢院所定不倫乙夜親覽次其高下遂御崇政殿賜祖秀實
以下二十一人及第秀實蒲城人也

三年二月乙酉詔罷三舍並諸路提舉學事官
宣和三年二月

月詔罷辟雍而取士以科舉之目者梁師成之言也時王取
為左相用事而師成從中秉權以相表裏因取天下贍學錢
始言作糴本謂若封樁者事定悉歸應奉司為伎淫巧實本旨云

進士宋齊愈等

三月丁未御集英殿策試遂賜何渙宋齊愈范宗羽楊楚林
史藻席益陳康伯何知柔楊懷文之奇朱癰楊羽衡楊師心
杜軫馮舜臣史度師敏功等以下六百三十人及第出身時
有二士對策甚直初考陸德先輩欲重致其罪而詳定官李
邦彥見而奇之奏乞聖裁遂置甲乙科乃劉寧正范宗尹齊
愈臨邛人換永康人宗尹鄧城人也

四年二月癸巳初貢院黜檢除朝廷選外餘聽知舉奏辟既
久遂成私舉已詔罷奏辟至是言者謂春秋銓試今尚奏辟

亦令依貢院法 丙辰詔從之

五年三月詞學兼茂科選人秦檜循一資檜江寧人

六年閏二月知舉宇文粹中上合格進士楊椿等 庚子御

集英殿策試遂賜沈誨周執羔王翼陽允恭柯伯熊沈灼文

壽常一王椿時衍之郭由中孫宗鑿史光閻安祺朱倬李就

孫廷揚程驥史寅鄭克蘇欽唐迪孫伯達樊汝霖鴻時行趙

沂楊時牟國才范游史和駿魏發等八百人及第 以貢士人眾特添省

額一百人 椿眉山 人誨錢塘人文通孫也時內侍梁師成交

賜御製詩 通賓客招賅賄士人納錢數千緡卽令赴廷試以獻頌爲名

而官之至百餘人及唱第之日侍於上前奏請升降皆出其

口其小史儲宏者亦登第而執廝養之役如初 七 年上舍

三人元盥黃應南王師亮等並賜同出身建炎以後並在後集

...

...

...

...

...

...

...

...

...

...

太平治蹟統類卷二十八